

OLA

PULETINI A'OGA



OTOOTOGA

FAAPAFALA IUGA AUT MO FAIA'OGA

O se tala fiafia mo faia'oga na togia mo le vaea ina ua toe liuliu ala o le lupe, i le pulega a le a'oga ma toe fa'auau ai la latou tautua mo se ono masina. Pei ona lipotia i se taimi ua alu, e 170 ni faia'oga a le iunivesite na fuafua e faamalolo, ma aga'i atu ai faitioga i le pulega. E ono masina ua tuuavana ai le pulega mo faia'oga ia latou fuafuaga mo le aga i luma.

FAAMAVAE LE PULE

Ua faamavae le pule o se tasi a'oga i Aukilani, ina ua lu'iina lana faaiuga e faafaigaluega sona aiga na faamaonia sona solitulafono e le faamasinoga. Na mafua ai ona faia se su'esu'ega ma faamaonia ai le faia'a le pule ma le tagata faigaluega. Na muamua faamavae le tei o le pule, a o lea ua mulimuli atu ia.

GALUEGA IT 'ALOFIA E TAMAITI

E molimau faamau o numera, e faale tosina fanau i mataupu tau le IT (Information Technology), e ui ina faamaonia le tupe lelei i totogi e fua i isi galuega. O galuega i le IT e amata i le \$89,710 e fua i le \$61,350 mo le tele o isi galuega. O se paso lea o loo taumate, ae manatu nisi e mafua i tala sese feavea'i, e faapea o nei galuega na o le saofa'i. O isi fo'i e manana'o ai ae manatu latou te le mafaia.

FAIA'OGA MATUA

O le alii o Mike Carter, 86 tausaga le matua, o loo toleni nei o se faia'oga i a'oga amata. I se ofaga i Papamoa o loo fai ai lana practicum, a manuia, ona ulufale loa lea i le faiva. O Mike e le fou i le faiva, sa mua'i galue o se faia'oga o le numera mo se 40 tausaga, ae e le i mana'o e malolo. O lea na ulufale ai e toe tapena mo le tapulaa amata. Ta'utino Carter, o le tausaga ua na o se numera. A o ia o loo sauni e galue se'ia aulia lona 250.



O A'U LE SUIGA: E le toe faatali i faipule ma le aumatutua. E foliga ua taligā se lavea'i mai ia i latou. O Mahatma Gandhi e ana le upu, fai oe ma suiga o se lalolagi e te fia vaai ma nofo ai, amata ia oe tusa pe e te laitiiti ma faatauva. O le tali leni a fanau ona o mea moni ua tutupu i leni taimi.

Tofiga pule mo Samoa ma Niu Sila

NA AUTASI le fono faatonu a le Iunivesite Aoao a Samoa e ofoina atu le galuega o le pulea'oga i le tama'ita'i faia'oga o Tuifuisa'a Dr Patila Aмосa (ata). O le avanoa sa tu'ua ina ua faamavae le sa tauaveina, Aiono Dr Alec Ekeroma.

Sa ta'ua itu lelei ma tusaafia na faavae ai le faaiuga a le pulega faatonu mo Aмосa, e aofia ai agavaa tatau ma le potomasani e tauaveina ai le tofiga. E to'afa le aofa'i o i latou sa talosaga mo le avanoa.

O le afioga ia Tuifuisa'a sa galue i le matagaluega o le Saienisi i le tofiga o le Dean, i se tautua fa'auau i le faiva faia'oga, laasia se tolusefulu tausaga. Ulua'i galue i le kolisi o Samoa ona ulufale ai lea i le NUS i le 2016 e aulia mai leni tofiga.

E iloga le tala o Dr Aмосa auā o ia o se tasi o tama'ita'i a'oga faavae a le iunivesite a le atunuu, ina ua faato'a afuafua lana silapasi ma polokalame a'oga. Sa auina atu i le polokalame sikolasipi mo su'esu'ega i le Iunivesite a Flinders i Ausetalia, ma Otago i Niu Sila. O lona tusipasi o le tofa manino o lena i le moana ma lona faaonaina. O ia le ulua'i faamatua i lea atamai faapitoa i le moana ma lona si'osi'omaga.

O ia fo'i le ulua'i tama'ita'i ua se'ei i le nofoa o le pule o le iunivesite, sa a'oga ai fo'i.



O le vaiaso fo'i ua mavae atu na faailoa ai le tofiga fou o le alii polofesa, Steven Ratuva (ata), e le Iunivesite a Kenetaperi i Kalaiesetete. Ua se'ei ai nei i le tofiga o le Pro-Vice-Chancellor Pacific a le a'oga. O se tofiga fou leni a le a'oga ua avea ai le alii polofesa ma ulua'i nofo mo tagata Pasefika.

Na saunoa le pule o le a'oga e faafetaia le sao i matau o Ratuva i le pulega sinia a le a'oga. O se laasaga lelei mo Pasefika o alala ai, o se avanoa taua e fai ai so latou sao i tonu fai o le a'oga.

Faapei o Dr Aмосa, na amata fo'i le taumafai i lona nuu, i le iunivesite a le Pasefika i Suva, ma galue ai fo'i o se faia'oga ma se taiulu se'ia tu'ua lona atunuu mo nisi avanoa i fafo atu. Sa galue i le iunivesite a Aukilani a o lei tofia e avea ma faatonu o mataupu tau Pasefika i Kalaiesetete.

E lei mamao atu le tofiga o le afioga ia Toesulusulu Dr Damon Salesa i le tulaga pule a le AUT, e molimau i le laalaa i luma o faia'oga Pasefika, i tofiga pule, e le gata i nuu moni, a o nuu o loo aumau ai.

Asiasi fo'i i le tatou upega ola888.com mo se fa'aopoopoga i lau faitau.

TALANOA A'OGA: SAILI AUKUSO

O sulu e tele e maua ai figota mo le tausiga o fanau iti a Kalaiesetete



E LUA ASO o le fono sa fitaituga ai le Matagaluega o A'oga i Kalaiesetete, i ona sui sa latou faamaopoopoina le faamoemoe. O le vaiaso na se'i mavae na faataunuu ai, i le maota o feiloa'iga a le Ekalesia Peresepite St Paul, i le aai a Kalaiesetete.

O le fa'amoemoe o le fono, o le tapu'eina pea o le galuega a faia'oga i le tapulaa amata poo a'oga faamasani, a o lei ulufale atu fanau i a'oga a le malo.

Sa mua mea i Matautu Sa, i se sauniga na ta'ita'ia e le susuga a le faafeagaiga, Rev Makesi Alatimu, ma faasolo ai le polokalame o le aso muamua.

Sa amia tootoo togia o le fono e iai le afioga ia Salā Dr Faasaulala Tagoilelagi-Leota i le mau su'esu'e ma le potomasani i le faiva. O Dr Maria Cooper sa talanoa i le taua o le taitaiga faifaatasi. O Dr Jeanne Pauuvale Teisina sa tufa atu lona potomasani o se ta'ita'i a'oga Toga i mea faataunuu i lana aganuu. O Dr Salainaoloa Wilson sa ia talatala le afuaga o le malaga a le gagana Samoa aemaise o faafitauli o loo feagai ma gagana a le Pasefika. O Coralanne Child o le matagaluega sa tatalaina le fono.

O nisi o galuega faasoa e iai lena a le CORE, ta'ita'ia e Ruta McKenzie ma Glenda Albon. Atoa foi lena a le AATA, sa ta'ita'ia e le Associate Professor Jacoba Matapo ma Dr Tafili Utumapu-McBride. O le alii faia'oga ia Tualoina Latu Toomaga sa faasoa i aga o le fai'ai o se tamaitiiti ma lona atina'e. O ia o le faatonu o lana pisinisi ua faaigoaina, Positive Impact Consultancy.

O le laulau sa faia le nafa o le iloilo ma lauliliu faasoa e aofia ai Saul Luamanuvae-Su'a, Havana Vili, Palepa Letiu, Sarah Naqova, Lima Magele ma Pauline Luafutu-Simpson.



Ata i luga a'e: Dr Maria Cooper, Assoc Prof. Jacoba Matapo, Dr Tafili Utumapu-McBride, Dr Salainaoloa Wilson, Dr Jeanne Pauuvale, Sala Dr Faasaulala Tagoilelagi-Leota. O nisi o faia'oga Samoa galulue i tofiga sinia i a'oga ma faalapopotoga. Ata i luga: Le laulao o le upega mai uto e aulia maene i le ta'ele, tele lava i'a o le faiva ona o le upega ina a malosi.

Sa iloga foi le lagolago mai a faiganuu Pasefika i ona ma'ave esese e ala i susuga i faia'oga ma sui o ekalesia ma laumua a'oga sa auai i nei aso.

O isi sa iloga ni sao e pei o le afioga ia Fuimaono Dr Karl Pulotu Endemann, Siale Faitotonu, ma Professor Bruce McKenzie, i le faasoa lautele.

Fa'aloaloa lou aao mafola mo e o loo mana'omia lau fesoasoani

Ua lagona i tulimanu uma o lenei atunuu le valaau mo se fesoasoani. Mai Aukilani ma itumalo i matu ma sasa'e e aga'i mai ai.

Mai uso mafatia, o aiga, fanau, e oo lava i fagafao ma mea fafaga. O lenei talosaga a le Koluse Mumu e le tauilo le faamoemoe, e faatino ai ana galuega lavea'i i nei itumalo.

E lua auala e mafai ona fai sau fesoasoani. Muamua, i le avea o oe ma se tagata faigaluega e ofoina atu lou taimi e te galue ai, e aunoa se totogi. Lona lua, i lou aao mafola e ala i se tupe e te faimeaalofa ai mo le faalapopotoga.

Afai o iai sau fuafuaga faapea, faafesoota'i loa le numera lenei: 0800 733 27677.

O galuega fesoasoani e aofia ai lou asiasi atu i fale o aiga ma taulaga foi, ma talosaga mo ni tupe mai tagata. A o le fesoasoani masani o le ofo atu o sina seleni mai lou tumu, e lagolago ai fuafuaga a le pulega. E maua nisi faamatalaga i lana upega.



TALA A'OGA NIU SILA:

Fonoa laumua mataupu i totogi o faia'oga ma le ofo a le malo

I le vaiaso na se'i tuana'i, na fonoa ai laumua o le atunuu i ana faia'oga, e talanoaina le mataupu i le ofo a le malo i o latou totogi.

E tusa ma se 30,000 pulea'oga ma faia'oga mai vaega eseese o le tulagalua ma le tapulaa amata, sa soalaupuleina le mataupu, ma auai foi i le palota pe talia pe te'ena le ofo a le malo.

I le aai a Kalaiesetete e tusa ma se 1500 ona sui sa tumu ai le Town Hall i le Aso Tofi, ae faapea foi isi aai ia latou fonotaga sa faia. Ta'ua o se tasi potopotoga to'atele o le aufaigaluega i le aai o togalaau, ua mafai ona faamaopoopoina.

Aulia mai le aso, ua tauaaoina nei e le pulega le iuga o le palota, ma ua te'ena ai le ofo a le malo e pei ona faatuina.

Sa ta'ua e le peresitene o le iuni, Mark Potter, le solotete'e o se filifiliga mulimuli, ae o le a tilofia ma le toto'a, pe afai e leai se suiga mai le itu a le malo e tusa i le laufetoa'iga.

E pei ona silafia, o se mataupu lenei ua loa le talitalia o se iuga e malilie uma i ai itu e lua— NZEI mo faia'oga ma le malo.

O loo tu le ofo a le malo talu mai Tesema o le 2022, e \$1500 e totogi i luma ma le 18.5 pasene e siitia ai totogi.



Foliga Town Hall a Kalaiesetete i le Aso Tofi tuana'i. Na matua faatumulia i susuga e tusa ma le 1500 le aofa'i. Ata Lee Kenny

Peita'i o lea ua manino le tulaga o le iuni ma faia'oga, e foliga e leai se isi tu'aulafoga.

Na saunoa le peresitene ma ia ta'ua le tulaga o lenei lava taimi. E ao ona tilotilo le malo i le si'i mauuluga o le tau o oloa, le siitia o tului a faletupe i e togi fale, aemaise o tiute faapoopo mai lologa ma matagi e le o faitauina i le lisi o tiute masani.

O le ulua'i ofo i le 2022 sa matua te'ena e sui o le iuni, aofia ai ma faia'oga o a'oga amata.

O loo feagai le malo ma isi foi lu'i faapea, e iai lena

a faia'oga o iunivesite ma politeki, i o latou totogi. Ae le gata i lena o vaega e mafua i suiga o le numera o fanau a'oga e ulufale, ma isi faapogai. Na te'ena e le malo le talosaga a lana iuni e avea ma se tasi puluvaga i le talanoaga a faia'oga ma pulega.

Ona o totogi lava ma faamanuiaga o loo mafua ai fetoa'iga i le va o le malo ma iuni a faia'oga. A le o faia'oga, o iuni a pulea'oga. E manatu foi latou e le o tali mai le malo i o latou mana'oga e fua i le lasi o tiute fai.

Finau faia'oga itumalo i saute mo le faaleleiga o mea e tua i ai

O le aso muamua o le masina na fonoa ai faia'oga o le itumalo i saute, Southland, e talanoa i mataupu o loo laualuga ia latou faamamafa. Sa aofaga potopoto i le aai o Invercargill i le Aso Lulu, faletalimalo a le Ascot.

Muamua le ofo a le malo i totogi, ma sa fa'aalia ni taofi i le mataupu, ma faia foi se palota faalilolilo e saili ai le tulaga o le talia pe te'ena le ofo. O pepa o le palota na faitauina faatasi ma palota a isi itumalo, ma maua ai le tali manino o le fesili – e te'ena.

Lona lua, o le tulaga i mea e tua i ai le faatinoga o le faiva. Na malosi le faasea a le fono i le tulaga mana'omia o le faaleleia o mea e tua i ai le faiva. Muamua i faia'oga. E le lava le aufaigaluega. O le isi itu, e le nonofo umi.

O se tasi lea faafitauli tuga sa ta'ua, e pei ona faaalii i taofi o le fono, e le mafai ona nofo umi se faia'oga i se a'oga pe afai e leai ni alaga'oa ma ni meafaigaluega lelei e tua i ai.

E mana'omia e faia'oga se faiga e lagolagosua i a latou taumafaiga. Amata i se si'osi'omaga fiafia ma saogalemu. O le tasi mafua'aga na te'ena ai le ofo muamua, ona o le leai o se tali a le malo i le faafitauli o le to'atele o tamaiti i se vasega. Faapena foi se faiga e lagolago ai le pulea'oga ma e i le pulega sinia. O se tasi lea fe'au sa leotele lona faaleoga i le fono.



Sui o le NZEI i le itumalo o Southland e feoloolo foi le to'atele, faatasi ma sui o a'oga amata, e amana'ia foi so latou leo i taupulega a le iuni

A faaletonu mea e tua i ai faia'oga ma pulea'oga e afaina le fanau, saunoa se faia'oga a'oga amata.

O le tele o faia'oga e fia nonofo pea ia latou galuega, ta'utino le faia'oga, ae ona o totogi e mafua ai. A fua i le faasoa tautupe, e sili atu isi aai ma a'oga i fafo atu o le itumalo.

O le tasi vasega o loo tu malosi i lenei te'ena o na o le a'oga amata. E 'autasi o latou sui e le o tutusa le faiga o i latou ma isi uso a faigaluega. E feoloolo ua faamaamulu ma faapea ona afaina ai se lumana'i

solo lelei mo fanau iti a le itumalo. O nisi ua toe saili tomiai fou ona ua leai se isi filifiliga.

O le sooupu o a'oga amata, Cara Sharp, na saunoa faapea e le o le tupe, a o le avanoa mo faia'oga e faalelei ai tulaga o fanau, ma mea e tua i ai le faiva.

A lelei ona lagolago faia'oga, e fua mai lena i ausiga manuia mo fanau i potua'oga, saunoa se sui sa auai.

'E le mafai ona faatino le faiva a o loo atupopole le faia'oga i le pili e le o totogia, ona e laitiiti le totogi, saunoa le sui sa ta'ua.

TALA A'OGA NIU SILA:

Laga e se tama'ita'i su'esu'e le mataupu i konekarate taua'oga

O le tama'ita'i o Michelle Duff, lauiloa i lana tusi ia Jacinda Ardern, o ia foi o se tusitala ma se fairipoti i mataupu tau le atunuu lautele, na ia lagaina lenei mataupu.

O le mataupu i le faafoega o konekarate taua'oga amata, e talitonu Duff o loo faumalo ai ni pulega se fa. O lana finauga, e le o se mea amiotonu lea. O lana faaiuga fo'i, ua mafua le le taliina o mana'oga o le tele o tamaiti, ona o lenei faumalo a ni pulega se fa. E lei poi foi e ta'u lenei faiga o se taaloga i se sailiga polofiti. Ma ia faatu mai le fesili i le atunuu, Aisea ua faataga ai fanau e fai ai ni pisinisi—a o ai o loo togia le pili o nei faiga?

O le tama'ita'i o Duff sa feagai ma se su'esu'ega e asia ai tulimanu o le atunuu, sa siligia foi faia'oga ma taiulu o pulega, ma tilofia foi laupepa o ripoti ma faamaumauga, e iai ona taunuu i lana faaiuga. E lavelave ma auilili le ripoti ae tau o se aotelega ona o le avanoa.

Muamua, e fa pulega o loo faasoaina se vaega tele o le \$2.3 piona mai le malo mo le atina'e o a'oga amata. Ae a fua i le tulaga o mea e tua i ai fanau ma faia'oga, e le o atagia ai sea tufatufaga maoa'e, molimau Duff. O ofaga e tumu i pelesitika ma mea faafoliga, o faia'oga ua tauau e siilima, o faia'oga ma pili e le totogiina. Ona o na faaletonu ua mumusu ai nisi matua e ave a latou fanau i le a'oga.



Porirua Whanau Centre o se tasi ofaga i Ueligitone e a'oa'o ai le fanau i le gagana Samoa, e fai foi sona sao i le atina'e o fanau



Michelle Duff

Ua iloa i le su'esu'ega o nei pulega e sili ona taugata a latou pili mo matua, na i lo isi pulega laiti. Ae \$450 miliona o loo latou maua mai le malo i tausaga ta'itasi, e muamua le Best Start, 9.8 pasene na te maua.

E le o iai fo'i se faiga lelei e siaki ai le

fa'aaogaga o nei tupe a le atunuu, o le popolega lea ia Duff ma isi o loo matauina aga o faatinoga.

E le faimea pulega laiti i na e tetelē, pei lava o aga o galuega tauofo, o lea e lilifa le faasoa i na e lapopo'a, auā e mauafatia i numera ma saga tetelē ai o latou tufa'aga.

O Niu Sila le tasi malo aupito telē se vaegatupe togia e faatupe ai a'oga amata, \$2.3 piona i tausaga uma, ae a fua i le tulaga o mea moni, e le o atagia lea i fua o molimau vaaia ma mea tino mai. O le a faalautele atu se faasoa o le mataupu i le isi a tatou lomiga.

Tuua'iina e Luxon le mau konesale i mafatiaga o fanau ma aiga

A o laualuga talanoaga i le tulaga o fanau a'oga amata, ua tuua'iina e Luxon, ta'ita'i o le National, le faula'i o galuega faakonesale, o le tasi faapogai o le le lava faatupeina o a'oga a fanau iti.

Na saunoa Christopher Luxon, ua so'ona faafaigaluega e le malo ni konesale e faia a latou galuega, ae afai e faasaoina mai totogi o i latou na, o le a auala ai se faatupega lelei o le tausiga o fanau laiti.

Saunoa Luxon, afai ae tula'i mai e faafoe le malo, o le a ia poloa'iina loa matagaluega a le malo e faasao mai le \$400 miliona o a latou tupe fa'aalu i konesale faipisinisi. O lena vaegatupe e faatupe ai sea faiga fou, e avanoa ai aiga uma e talosaga mo le 25 pasene o a latou tupe faaalu i le tausiga o fanau, e toe totogi mai. E tusa ma se \$250 miliona le aofa'i e faatino ai lea fuafuaga.

O le fuafuaga e faatatau i aiga ta'ito'atasi ae le o le aofa'i o tamaiti o se aiga. Ua faailoa fo'i le agavaa o se aiga e auai, mai le \$140,000 e aulia le \$180,000 e agavaa i ai.

Mo le aiga e maua le \$140,000 tuufaatasi, e \$75 latou te maua i le vaiaso. Ma faasolo ifo ai i lalo i le \$18.75 mo aiga e maua le \$170,000 i le vaiaso. O aiga e sili a'e i le \$180,000 e leai se faamanuiaga e maua.

E talitonu le alii ta'ita'i o lenei fuafuaga fou o le a iloga le faamama avega i aiga i le tausiga ma

le faaa'ogaina o fanau iti.

E manatu isi o le fuafuaga lea a Jacinda Ardern sa faailoa a o lei faamavae faafuase'i. Lea ua gaoi e le National. Na faailoa e Ardern lana fuafuaga mo se \$190 miliona mo le tausiga o fanau, e faamama ai le sausu mamafa a le tau o oloa. A o lea ua apo e le National ma folafola o sana mea e faataunuu.

Saunoa le sui palemia, Carmel Sepuloni, o se tali faatopelau lenei a le itu agai, mai le mafaufau o le ona le taofi, le palemia tuai a le Leipa.

Ae na ia faafetaia le National ua tau ane sana faatatau i lea faamamafa masani a le Leipa. Na ia toe faamanatu i le National ana tipi tetele i le atina'e o a'oga amata e lei mamao atu.

E le talia e Luxon le taofi o lenei fuafuaga o le a una'ia ai nisi siitaga mo matua i a'oga amata. O lona



KPMG o se tasi kamupani faipisinisi i Niu Sila, i le lisi o pisinisi tetele, pei foi o le Best Start mo a'oga

manatu, e le tupu se mea faapena ona e tele pulega o loo tauva. E leai foi se pulega e faia lea auā e manumanu i le o ese o matua.

O le \$400 miliona na ta'ua ua na o se kuata lena o le aofa'i o tupe faaalu i kamupani konesale tetele i Ueligitone ma Aukilani. O na tupe o saofaga a tagata lautele ia latou lafoga o loo tipi mai o latou totogi.

Na faailoa e Luxon lona sauni e toese na mai ia i latou ae avatu i aiga o loo tautua malosi i le atunuu. Pe a fai lena e manuia le palota.

FAASOA FAAOPOPO: LPSL TAVITA

Aga'i pea ina taugata le tau e nonofo ai i lo tatou paneta

E IAI LE SOOTAGA o le taugata o le tau o mea'ai ma oloa ma le suiga o le tau. Ma o le upu moni, o loo aga'i pea ina taugatā le tau e totogi tatou te nonofo ai i lo tatou paneta. Ae e lei faapena le fuafuaga.

O lou lava ofaga mai le Atua, foa'i fua mai, a o lea ua toe totogi le rent? E le sa'o. O le fesili, e totogi ia ai? O le tali, e totogi i le vai, ma le 'ea ma le afi, ma le eleele ua to'atama'i.

A tuliloa upu o le Tusi, o loo ta'ua ai le lalolagi o se galuega lelei ma le atoatoa na faia e lo tatou Atua mo i tatou. O le parataiso, ofo fua mai. E faigofie upu o le feagaiga, a tatou tausii lelei i ai, na te tausii foi tatou pei se tina agalelei i lana fanau.

Talanoa mai saienitisi i le tala'aga o lo tatou ofaga. Fai mai o se taimi aupito paleni leni i lona tala, e fua i isi taimi e iai lena na liua ai i se polo 'aia (Ice Age), ma isi faapena. E paleni i le ta'otoga o pulega a fetu ma o latou paneta, le va o aniva e faitau miliona ma o latou ta'otoga ma pulega. Lo tatou paneta ma lona pulega, i le va ma lo tatou fetu e faamoemoe i ai lo tatou ola, a ni inisi e felata'i ai, lona uiga ua afaina i tatou. A so'ona malulu, e iloga se a'afiaga. A si'i le vevela i nai tikeri, e faapena foi.

E lei atoa se seneturi na sui ai e tagata lena paleni, ina ua amata le tausiliga a malo malolosi mo le pule ma le mamalu, ina ua maua le tekonolosi e faatino ai, ma faasaga atu e 'eli le fanua ma suotosina le moana ma sunui le lagi i au vevela o le 'ea palapala mai fale gaosimea, i le igoa o le 'aga i luma', 'atina'e manuia.'

E le se mea leaga le atina'e, pe a tuliloa upu o le Tusi, a o le tulaga o le eli se'ia le toe iai se mea e eliina, afaina ai le soifua o tagata, le aia tatau a isi meafaiola e nonofo ai, le fagotaina o le sami se'ia le toe iai se i'a e ta'a ai. Le susunu o le 'ea se'ia mamate la'au ma le toe iai se okesene e manava ai. Le fai pea lava pea se'ia tete'e mai le foafoaga, i le to'atama'i a le matagi, le eleele, le afi ma le vai.

Mai le va'ai faatausimea lelei, e iai le mea e ta'u o le fai ma le alofa, fai fuafua i le aso ataeao. Ae pei lava o le tala i le faifaato'aga na sauā i lana asini, ua mate ai, alu ane loa lea ua toso le palau, gau ai, ma iu ina maliu ai. Lesona o le tala, ia poto nei loa a o lei tuai.

O le mataupu i le suiga o le tau lalolagi aoao, ua iai nei i o tatou lumafale ma e le mafai e se poto ona toe faafitia. (O i latou e pei o Donald Trump ma le afaafitititi a le lalolagi, e laitiiti lava le aofa'i ae leotetele. Aofia ai ma se pasene feoloolo e talitonu i le suiga o le tau ae faaleano i ai).

I le Pasefika nei, ua iloa le le faigofie ona tauilo aga a malos'aga e fa, i se vasa telē ma le laolao, ona ua si'i le vevela, ua mafua ai ona faaupu'e le malosi o au 'a'asa na te taofi, e alu a'e i luga ma gaosia ai matagi malolosi.

Fai mai se taofi sa fai ma vasa'i maninoa i matagi ta'i tasi tasi, e lei mamao tele atu, a o leni ua sapotu mai toe o tausaga uma. O molimau manino ia i le tulaga o le tau ua fe'ai ma e o'o ina fe'ai tele. Sa lei talanoa Niu Sila i ni afa taavivili na o afa fulifao. Fai mai na o Amerika e maua ai, a o leni ua o'o mai fo'i ma nofomau e le tau faia ni ona pepa.

Fai mai le palemia fou, Chris Hipkins, o le ulua'i malaia faanatura leni ua lofia ai Niu Sila i se tulaga pagatia, i se tupulaga. Moni e laitiiti le afaina i le soifua maumau (11 maliliu e aulia mai leni taimi), e faatusatusa ma isi faalavelave, ae maua lona tau ma le afaina i le tamaoaiga, ae faapea aiga i meatotino, ae le ta'ua isi maumau i tautua e iai



LOFIA I LE PULE A LE SUAVAI: Se va'aiga i se vaega o le itumalo o Hawkes Bay na iloga le pagatia i timuga aveva ma lologa

falema'i, falea'oga, aemaise aafiaga taulemafaufau.

E lei mamao atu le tete'e a faifaato'aga ina ua faatu atu e le malo ni suiga e tali atu ai i le faafitauli. Na mafua ai ona aga'i atu ni solo uumi o palau ma taavale i Ueligitone, e faailoa la latou tete'e. Fai mai o le palemia o le tevelo, o le fili. Ua a nei la? O ai le fili? O le fili e le o le ta'ita'i a o i tatou lava. Tatou te faafitia le mea moni auā e musu e fa'aalu se tupe, e totogi sina tau. E le pine o nisi o i latou na sa auai, o loo nonofo ma ni lotofuatiaifo ta'usalaina.

Ae e le so'ona tusilima i se tasi poo se malo, auā o le malaia e tuua'iina ai tagata uma lava, aemaise faipule ma ta'ita'i e faia tonu o le lalolagi. Ona ua faasili le tupe ma le polofiti ma le tausili ae galo ai le to'asa o le Natura lava ia.

Vaganā se tagata mau'oa pei o Trump, e vaai ae le vaai, na te faafitia pea le tulaga moni o molimau vaaia. Toe o vaiaso uma e tupu ai se faalavelave faanatura i soo se itu o le lalolagi. Pe a to'atama'i le eleele, le 'ea, le vai ma le afi. O malos'aga na e fa o loo pulea le foafoaga. O malos'aga na faia e le Atua e tautuaina le tagata, a o na fo'i e toe faasaga mai e a'oa'i le tagata pe a galo lona tiute o se tausimea a le foafoaga.

E manaia le faalogo atu i nisi ta'ita'i i le faama'ite o le a'oa'oina o le tau ma ona suiga i totonu o potua'oga. E lagolagoina tele se na faama'ite. O se mea tatau le manino i le fanau o le taua o le galuega tausimea, mulimuli mai ai le tekonolosi ma isi mea. Auā e leai se aogā o le telefoni pe a ma'i i le 'ea palapala.

Aisea le faamuamua? O fanau o ta'ita'i i latou o aiga, nuu ma malo ataeao. E le tau fesiligia itu lelei o le tatau ona inivesi ai se malo auā lona tofi fa'aauau. E le faatali se'i aulia le iunivesite ona faato'a a'oa'o lea e sina pasene itiiti o le fanau.

I nisi o su'esu'ega fai i le suiga o le tau, ua iloa ai le to'atele o tagata Pasefika e leai se malamalama i leni mataupu. Fai mai nisi o mea na e gata i saienitisi ma le 'aufaitonu. Ae e sese sea taofi.

E sauni leni faasoa a o loo fonoa Suva i ta'ita'i a le Pasefika, e le tauilo o le tasi lea mataupu i le lisi o mataupu, aemaise o le fesili poo afea e liulualo mai ai malo malolosi i la tatou tagi mo le lavea'iina.

Ua tofo soo Ausetalia i le a'oa'iga, lea fo'i ua tofo Niu Sila. Faitau piliona tala le tau o le a totogi i le to'asa o le vai ma le matagi. O le tatalo, ia aveva mea tutupu ma fafagu i o la ta'ita'i, e telē so la sao i le faaleoina o atugaluga o malo Pasefika i tonu fai o le lalolagi. Ua manino le fe'au, e le faailogaesea se atunuu e le faao'osala, e tutusa le tama'i motu ma

se konetineta. I leni lava vaitau, ua iloga le ogaoga o lana ta i konetineta ma malo tetele. O nisi o i latou nei o loo tausolomua le fai otaota i le fanua, le sami atoa ma le 'ea.

Lea foi o loo ta'u se fuafuaga a le malo lapani e sa'ati ni tone o ana otaota niukilia i le vasa Pasefika. E to'afia ni malo Pasefika o lagolagoina lea faiga, ona o le teuga o le va ma se malo mauoloa?

O mau faavaea nei: O pole 'aia i matu ma saute ua faatele'a'i le liua ma suavai, alu a'i malelemo ai le lalolagi pe a leai se mea e faia i ai? Ua fa'aalia le popolega i saienitisi o le liu suavai o pole aisa e lua a o lei aulia le 2050, valo'ia e nisi le 2035 ona o le tuga o le faafitauli. E tatau ona tatou popole, auā a le o i tatou, o fanau ma fanau e pagatia ai.

I le faata'oto a Iesu i tamaiti e tafafao i malae, e atagia ai lo tatou uiga fa'aali i leni mataupu (Mataio 11). Usu e isi le pese ma sisiva ae nofonofo lava isi. Fetagisi isi ua tafefea o latou fale i le vai ae aunoa lava se ano atu i ai o isi. A o taumafai le 'aupopoto i le tau e ta'u mai le mea moni, ae faifai isi ma faali le uiga faaleano. Se'ia oo mai faafuase'i le malaia, a ua tuai.

Manatua leni mea, o suiga ogaoga o le tau, e le faasinoesea ai se malo, se tagata. Ua tatou va'ai tino ma molimau, e le o se fagogo, o mea moni lava.

O le a so tatou sao e fai o ni tagatanuu? Mai le vaai faalea'oga, o soo se tapenaga lava e tali atu ai i se lu'i tele e pei o leni, e amata i le mafaufau. Amata i mafaufau o fanau iti, auā o latou o le lumana'i o nuu ma malo mo ataeao. Tatou te a'oa'o le fanau i le taua o le faasao mo ataeao, le ola malamalama i le va tapuia o pule o le foafoaga, ia faataua aia tatau a manu, la'au, i'a ma le vao ituaiga o loo tatou nonofo faatasi i le ofaga e tasi. Upu moni, e sili lo tatou mana'omia o i latou nai lo latou o i tatou. A leai latou ua leai fo'i tatou.

Tatou toe a'oina se mafaufau fou e sui ai tu ma aganuu o le faaloloto, faatautala ma le so'ona fai. Pe toe mana'omia i nei aso ni aiga e tele atu taavale i lo tagata? O ni fesili 'anoa na e ao ona taula'i i ai tomanatu a fanau. Pei lava ona manino le mataupu a le Alii, e le o le ofu a o le ola e taua (Mataio 6).

Talitonu fo'i ua lagonaina le fe'au a le matagi ma le vai i potu fonu o malo malolosi, e manino ai i o latou ta'ita'i, a goto le va'a, e o ifo ai fo'i ma latou.

O le alii ta'uta'ua o Sir Attenborough, e talitonu e mafai ona tatou suia le alavaa i le faaumatiaga, pe a gaoioi nei loa o tatou ta'ita'i, ma i tatou uma. Saunoa Attenborough, "O iai le avanoa. Atonu lava tatou te toe faafo'i mai lo tatou parataiso, tainane i se tau e lavatia e i tatou uma."

Faasoa o le Vaiaso:

Sauaga i totonu o aiga, o se mataupu a ta'ita'i o nuu ma aiga ma tagata uma

O le Aso Lulu o le vaiaso nei e faamanatu ai e le Lalolagi ia tama'ita'i. A o le aso 10, Aso Faraile, e pa'ū i ai le faailogaina o tama'ita'i o loo galulue i le faiva o le faamasino. O nei lava aso o loo tausisia i lalo o le faamamaluga a Malo Aafaatasi i tausaga ta'itasi.

Ae mo le to'atele o i latou, ua na o se afei lenei. Auā a ta'u fafine, e muamua lava tau le mafaufau i sauaga e faasaga ia i latou.

O sauaga i totonu o aiga o se mataupu o loo laualuga i talanoaga a Samoa ma Niu Sila i lenei taimi. E faatatau lea i le sauaina o fafine, poo tina ma fanau e le tamā o le aiga. (Moni e iai ni aiga e faasaua le fafine i le tamā ma le fanau ae mautinoa e le to'atele).

Sauaga e aofia ai le fasi e faao'o ai ni manu'a i le tino, ae faapea foi le mafaufau ma le loto i upu. E leai se tamaloa e fia mamā, vae atu le mamalu o le aufaitau, e iai lava taimi e tofotofoina ai ma malo le fili; ae mo nisi, ua mafai ona mautali i le onosa'i ma le lava papale.

Ae faatatau tonu le upu i le tane e fai ma ia lea amio. Pe i le gagana a Samoa, ua pa'u a'i, ua avea ai nisi o i latou nei ma ni faamata'u ogaoga i le ola ma le saogalemu o ta'ito'alua ma fanau.

Ua le maua e le faasoa se molimau mai su'esu'ega e faamaonia ai faapea sa sauaina fafine i faiganuu ma malo a Samoa anamua. E foliga mai o lenei suiga i le amio na faato'a alia'e ina ua taunuu mai papalagi ma le mau e pule tamaloloa i fafine. E mafai ona faamaonia ai, sa malosi le osiosiga o tapu o le feagaiga ia Samoa anamua.

O lea suiga e le pine na suia ai fo'i le va'ai ma le faauigaga o isi a tatou upu e iai le nofotane ma le faiaivā. Avea ai le fafine nofotane o se tagata maulalo ma toe ā ina inosia. Pe ua sui se va'aiga e ala i le galuega a le Tala Lelei o le fesili lea, ae a fua i mea tutupu, o loo malo pea lea va'ai maulalo i mafaufau o le to'atele.

Fai mai na o nuu tauatia'e ma vaivai le ola a'oa'oina e maua ai, ae sese lea taofi. E toe lava ina tusa pau malo uma. Aumai Niu Sila e fai ma faata'ita'iga. E tu maua i le lisi o le 'au fasiavā.

Ma e le o se mea e ofo ai, i se aganuu e tapua'ia taaloga pei se atua, ma viia le malosi faatamatane. E o faatasi ma le tu o faiga pati i totonu o aiga i nei aso. O soo se faia'ina a le Warriors poo le All Blacks, o le po foi lea e oso ai i luga le numera o sauaga i tina ma fanau, molimau su'esu'ega.

Faatasi ma le vao faafitauli ua lofia ai aiga i nei aso, ae togisala tina ma fanau. Ma tainane le malosi o kemupeni e pei o le Lipine Pa'epa'e, ae o loo aga'i ina faatetele. Lona uiga e aunoa se suiga mai le tupulaga matutua i le tupulaga laiti. Faapei o le aiga pa'a, e faata'ita'i uma le 'aulaiti i le 'aumatutua.

E mata'utia le malosi o sauaga i nisi malo, feoloolo i isi, a e tasi le faafitiga, e leai se mea lelei e tupu mai ai mo i latou e a'afia. E o'o lava i le e faia le faasala. E tuufesili nisi alii, pe aisea e amio ai faapea.

O le a se tali? Fai mai ta'ita'i o malo e maua i le pululima faatasi. E maua pe a tatou ta'utino le faafitauli o loo tupu ma ola. E maua pe a tatou talia faatasi uma o se tiute faitetele. E le o se tiute na o le malo poo sina vaega o le nuu.

E le tasi se mafua'aga o le faasauā, saunoa mai foma'i faapitoa; ae lima ni mea e masani ona iloa faatasi ma i latou e faia: 1. e manatu i latou o se tofi le faatonu o le to'alua/fanau i le aga saua; 2. le taofi e aoa lana pule i le to'alua/fanau; 3. le manatu e leai se isi e aia mai; 4. o le auala lea e faataunuu ai o latou mana'o; 5. le taofi e taua atu o latou mana'o i na o le to'alua ma le fanau.

O le faanoanoaga auā o nisi o na mau e fa'aaoga ai le Tusi Paia i ni vaega e foliga e lagolagoina ai.

I le iuga o le aso, tatou te filifili poo le fea itu tatou te tutu ai, auā ua siliga se tali mai i auala tuai.

Pei ona ta'ua, e tu ese le aganuu a Samoa i lana vaai i le itupa vaivai. E sili atu i le aganuu a Mose e ana le Tusi Tulafono. Fai mai lea aganuu a agasala le fafine ona tau'ai lea i ma'a, a o Samoa e le faapena lana aga.

O se faamanatu lea i soo se tamatane Samoa, e le fo'ia le faafitauli i le aga saua. E iai isi auala e sili atu i lo le faafefe ma le faamata'u.

O lea fo'i ua tatau ai ona tatou galulue faatasi e tineia ia taofi tuai. O nei lava ituaiga taofi o loo tafuina le afi o sauaga faasaga i tama'ita'i.

Tupua o se measina soifua a le gagana

Mo le 'aumatau aso o mea tutupu, latou te silafia le taua o lenei vaimasina o Mati. O mea iloga tutupu i le tala o Samoa e faitaulia ai ma le aso soifua o lana afioga a le tamaaiga, Tupua poo le Tui Atua. E atoa ai le 85 tausaga o le soifua.

O Tupua le faia'oga o se faalupega e faitauina tutusa ma isi ona ta'uta'ua, i faiva malo sa iloga lausilafia ai. O le sa avea ma ao o le malo o Samoa, o le palemia, ma isi fo'i tofiga.

Pe faapea fo'i, sa palemia lava ma fai lona faiva o se faia'oga a le gagana ma le aganuu. Ona o lona sao i le gagana ma su'esu'ega tauleaganuu, e to'atele tagata ese e iloa ia o se faia'oga.

E molimau galuega ua faia e ta'ua ai le gagana ma lona fa'aaogaga e momoli le talafaasolo, ma soo se mataupu. E taua le gagana auā o le tofi o

Samoa mai le Atua, o le mau tauloto a Tupua, e ao ona o va'ava'alua ma le atina'e. A o ia lava fo'i o se faa'oa'o sili i le galuega atina'e, i le faaleoina o le leo Samoa mao'i, le fausaga, i upu fou ma tuai e faaofia i le utuvagana, le fe'au faalauiloa o le mau faa-Samoa i totonu ma fafo atu, a o se toe 'ulutaia e taofi iumaea i mea taua taulegagana e ao ona tausisia. E aofia ai le Tusi Paia Samoa ma lana gagana.

Ua avea fo'i le gagana ma auala e momoli ai se tofa manino o le olaga, e poupuina la tatou savaliga faalenuu nei ma le lumana'i.

E le to'atele ni o tatou ta'ita'i e taunapa i le tausia ma faaualoa le gagana, i se agaga pulunaunau ma le lotonuu.

E le finauina le tulaga o Tupua o se tufuga limalelei a Samoa, i la tatou leo ma le upu, i lenei tupulaga.

Faamau o su'esu'ega i sauaga i tama'ita'i

- **E tulaga muamua sauaga o fafine ai lima o sona to'alua; faaipoipo pe o se pa'aga foi**
E tusa ma le 1 mai le 3 tama'ita'i e faasaua i ai a latou tane poo ni paga ua nonofo faatasi. Tusa lea ma se 35 pasene o le faitau aofa'i o le lalolagi (fafine). O foliga o sauaga o lena o le faao'o manu'a atoa ma sauaga faaletu feusua'i e fai faamalosi (WHO 2017).

- **O le fasiotia o tama'ita'i e taulamua ai a latou lava tane poo paga e nonofo faatasi**
Fai mai le WHO i lana lipoti o le 2017, e tusa ma se 38 pasene o tina/teine e fasiotia, e tupu lava lea 'ai lima o a latou tane ma paga e nonofo faatasi.

- **E mafuli le au fasiava i alii e lei o i ni a'oga, sa aafia i ni mataupu tau le mafaufau ma le ola maloloina**
E iai le sootaga o le a'oga ma le mafaufau i le amio o le fasiava. Aemaise i latou na mai aiga e tumu i faafitauli; e le o ni faa'oa'o lelei matua i fanau; e leai ni tulafono o le amio e ta'ita'i ai le fanau e iloa le lelei ma le leaga (WHO 2017).

- **E malosi le sootaga o le si'osi'omaga ma le amio saua**
O le to'atele o i latou e faia le amio saua i tama'ita'i, e atagia tonu ai se si'osi'omaga na sau ai—i totonu o le aiga, se nuu, se vasega, se faalapotopotoga, poo se malo foi. E malosi le faasaua i nuu e pulea e le tapuaiga Isalama ona o talitonuga e faatatau i fafine (Sadiqi, 2014).

- **E le fesoasoani malo ma lotu i le faafitauli**
E le mafai ona vavae esea le malo poo le lotu mai se aganuu. E pei ona avea nuu Isalama ma se faata'ita'iga. Talu ai e le mau eseese le lotu ma le malo i le mataupu, o lea foi latou te faataligatuli ai i mafatiaga o fafine (Sadiqi, 2014).

- **E le fesoasoani le lalolagi o aganuu saua**
O soo se taaloga e ta'a'alo ai le fanau i auala faatekonolosi e faumalo ai sauaga. E fananau mai tupulaga i nei aso ma fesaga'i ma se lalolagi o sauaga moni poo sauaga fa'aata e ala i le PlayStation ma le TV. O ata tifaga e tu'una ai teine i se tulaga taomia, e faaualoa ai pea tu ma aga faumalo a alii. Ua avea nei ma faavae o manatu ma lagona o fanau tama; ma fua mai ai i sauaga.

- **E le fesoasoani le iai ma umia e tama'ita'i o tofiga ta'ita'i a le lalolagi**
E le o atagia i su'esu'ega le o faatasi o ni suiga i uiga fa'aali i tina ma le tula'i mai o tama'ita'i i tulaga tofi ta'ita'i a le lalolagi. Moni e iai le faataua i a'oga, le soifua maloloina, le fanau ma le tausiga o aiga, atoa foi le fausia o tulafono e puipui ai tina, ae le o so'ona suia ai le amio faaali. Ua ta'ua Niu Sila o se tasi malo ua iloga le siitia o le tulaga o tama'ita'i. Ae manatu nisi o nei suiga e lilifa i le faaletulafono, ae le o mafai ona suia le amio a le itupa malosi e pei ona molimau fuainumera. E le lavea Niu Sila i le lisi o malo e 10 aupito saogalemu mo tama'ita'i, ui ina faumalo pulega a tama'ita'i i tofiga maua luga.

Ne'i Mea Ane ua Galo

Atoa ai le 123 tausaga talu ona pulea Samoa e Siamani



UA AULIA AI LE 123 tausaga talu ona sisi le fu'a a Siamani i Samoa, i Mulinuu le malae o faautugatagi a Samoa, na amata mai ai le lalagaina o le tala e faa-Siamani lona faiga. E na o se 13 tausaga ma ni masina le umi o le pulega (Solofa ma Sulusi), a o au o lona pule o loo lagonaina pea i soo se vaega sa iloa ai lona faatinoga i le soifuaga o Samoa, mai lava i lona taimi. Muamua, i Pulega: O loo talanoa pea le 'ausu'esu'e ma iloilo ma toe iloilo pe na faape'i le pule a Siamani, ma faatusatusa foi i le pule a Niu Sila na sooina. Tainane ni taofi faaitu'au o ni tusitala Peretania, ae 'autasi le to'atele e iloga se sao o Siamani i le asaina mai o le gasu o se fausaga faaonaponei. Mai ia Solofa le amataga o le tala i le faamasinoga o Fanua ma Suafa o loo gaoioi pea e aulia mai lenei taimi. Pe na valoia e ia le iai o se lumana'i o sea pule, pe a fua i lona tula'i mai e avea ma se tasi tautua aupito mana'omia e Samoa i nei aso?

Atina'e: E leai se isi pulega e faaluaina Siamani i le atina a'e o eleele o Samoa i se tulaga maualuga, avea ma se alamanuia muamua mo lona tamaoaiga i lea taimi. I luga o faavae na faato'oto e Siamani na tu ai pulega a Niu Sila i atina'e tau faato'aga, aemaise o auala ma le taulaga, ma auaunaga moomia e iai leoleo, falemeli, faletalimalo, falema'i ma a'oga fo'i. Su'esu'ega: E le toe tauilo lea sao, i sao o nisi o ana sikola su'esu'e, i lo tatou talafaasolo, suafa e pei o Kramer ma Shultz, i le faamauina i upu ma ata, ua tatou avanoa ai i se vaaiga ma se molimau i le olaga ma le mau a Samoa semanu e maumau.

Measina: o nisi o vaega ta'uleleia o le pulega a Siamani o lona auau i a tatou tu ma aga, ui ina faitioina Solofa i le so'ona aia ma fa'aaoga

O LE ASO I LOU TALA FAASOLOPITO

SAMOA HISTORY

"Ne'i mea ane ua galu"

APIA 1830

Copyright Reserved LPSavita

~ MATI 1-18 ~

1

1900 Sisi le fu'a a Siamani i Mulinuu e faailo lana pule ia Samoa

1938 Aso soifua Tui Atua Tupua Tamasese Efi

2

1994 Aso Lulu. Savalia Apia e le Mau a Tumua ma Pule faailoa tete'e i le VAGST

3

1930 Feiloa'i le malo ma sui e 50 o le Mau. Faatu mai e Aleni (Allen) se lisi o mea e fai

4

1930 Tuuvaa ese Taisi OF Nelson i le Pomare faaunuu i Niu Sila

2001 Palota Samoa. Tumalo HRPP 23/49

5

1973 Tofia Pio Taofinu'u ma Katinale

1985 Tatala ulua'i a'oga amata Samoa i

Newton Ueligitone

6

1951 Tatala faalapotopotoga Au a Teine i

Malua. Salamasina ulua'i peresitene

7

1967 Amata tautua a le vaega'au o le filemu

Amerika 'pisikoa' i Samoa

8

1995 Tatala maota gasegase Malietoa

Tanumafili le II i Tuasivi

10

1881 Alaga le tupu o Malietoa Laupepa e le fono a Konesula e to'atolu

11

1889 Taunuu i Apia le USS Trenton

2003 Tofia Neroni Slade faamasino lalolagi ICC i Peleseuma

12

1880 Folafole le tupu o Malietoa Talavou ae suitupu Laupepa

13

2001 Faate'a Tuimalealiifano i le pule a alii ma faipule o Falelatai

14

1967 Usuia palemene lona tolu, toe filifilia Mata'afa ma palemia

15

1889 O le afa tele na gogoto ai vaatau e 6 a Siamani ma Amerika

1996 Malo David Tua fusi WBC ia John Ruiz

16

1923 Faigamalo a Richardson suia Tate

17

1864 Tatala a'oga faafaifeau Uesiliana i Satupaitea

1942 Nofioia Upolu e le marini Meleke

18

1872 Taula i Vaovai Falealili va o 'au a le malo ma le soofaatasi a Atua ma Aana

1997 Malo Jimmy Thunder ia Crawford

Grimsley matati'a 1.5 sekone umi fusuaga

sese lana pule faamalo. Na mafua ai le tala ia Lauaki ma le Mau a Pule, ma silafia ai e le lalolagi tomai o Samoa i faiva faaupufai o malo, i lea taimi. Pei foi o le tula'i mai o Taisi Nelesoni mulimuli ane i le finauga a Samoa ma Niu Sila. Gafa: Ua loa ona tala gafa Samoa i Siamani ma ni faia' faaEuropa, ma saga faaualoa ai lona vaega o le tala. Ona o polotiki o le taimi na mafua ai ona toe faafo'i faamalosi nisi i Siamani, pei foi ona fai e le malo Niu Sila i alii Saina.

Tomanatu: Faamata'ana se mea e le tupu se taua muamua, ma fa'aaauu pea le pule a Siamani i Samoa, poo a ni foliga o lo tatou tala e tula'i mai? Pe ono foliga i lona o Tutuila ma Manu'a ma le malo tele o Amerika? Pau lea, o le tala i pulega faakolone a malo malolosi, e le o ni tala e mita'i pe me'eme'e ai; se'i vagana ua tatou vaai i ai faaleagaga, e iai fo'i ni mea lelei na tutupu mai ai, mai totonu o ataata o le pogisa ma le faamata'u.

TOEGA O LE VAATAU A SIAMANI: Le SMS Adler (1883-1889), galue o se faaosaala a le malo o Siamani, e molia le a'oa'iga i se nuu poo se itumalo e tofotofa i le pule. E malamalama i ai tagata Manono ma Apolima, na tu'i faamo'amo'a o latou motu e lenei vaa i le 1888, sa api ai 'au a Malietoa. E le pine o latou na muamua ususu ina ua fao le fili i lumafale o le atunuu i le 1889, tu'i e le matagi. Fai mai nisi o le matagi na feula mai e Nafanua mai Pulotu. O isi e manatu o le aao o le Atua lava.

LAUFATU SAMOA: MAI LANA ATO PONAPONA

O le tofa loloto a Tui Atua Tupua Taisi Tufuga Tamasese Efi

O le faa-Samoa

O le faa-Samoa e 'au'au i le alofa, e amata ma faai'u i le alofa. Muamua ona faamautuina le alofa i loto o tagata. A mausali ona pei lea o ufi tutupu nisi mea e fanau mai ai.

Moliga o le faa-Samoa

E le talafeagai ona tautala le faa-Samoa i le aga a le asiosio. E le faigofie ona momoli le faa-Samoa i loto o le fanau i le gagana ma aga a le matagi to'atama'i. E ao ona momoli e le matagi agi malie. E momoli e le upu filemu.

O le fe'au

E ao ona o tatou manatua, e le taua le gagana ona o upu. E taua ona o le fe'au lea e momoli e upu. E le taua le solo 'ava ona o le solo 'ava. E le taua le nunu ona o le nunu. E le taua le faanofonofa ona o le faanofonofa. E taua le upu, le aga ma le taga ona o le fe'au lea e momoli.

A sese le fe'au e momoli e le faa-Samoa e au ina teva loto o le fanau.

E ao i le fe'au faaleagaga ona faamautuina ia mea taua o le olaga.

Faafailelega o fanau

E pele i upu, pele i 'ai, pele i aga, pele i foliga.

Ou te taofi o le tamaititi e faavae lona malamalama i le gagana o le Tusi Paia, o le tapenaga mautu lea i lona fa'aaoga lelei o le gagana Samoa.

Tala faasolopito o Samoa

Tele le aoga o Kalama. Pe ana leai nei ia ma isi, e tele ni vaega o le mau a Samoa semanu e maumau. Ae pei lava o le to'atele o nisi papalagi, o loo lima ta'ita'iina i le mau faumalo.

Ositaulaga

Na mafua ona tu malo le Mau ona i le taimi o le tulu'iga o fita e iai e le foi e faia le taulaga mo Samoa, poo le taulaga i le ola poo le taulaga i le oti. Pei lava o le a'oga tatou te maua mai ia Keriso.

Gagana Samoa

E feutaga'i le mafaufau ma le agaga ona fanau mai lea o le upu. O le upu e fesoota'i ai le Atua ma le tagata, le tagata ma le uso a tagata, le tagata ma lona laufanua ma le gataifale.

O le gagana e faavae ai nuu ma malo. E faaupu ai le mafatia, le alofa, le salamo, atoa ai ma lenei, e faamatala ai le tu ma le agaifanua. Auā a leai se gagana, e le toe mamafi aga faapitoa a le nuu.



A e nanu i le Atua atonu e fetoi, auā e le o sau gagana. Pe atonu e le mafai ona momoli le felefele ma le gaogaosa o lou lagona auā e te lei ola mai i nuu papalagi. Auā o lou lagona e afua mai i le mea na e ola mai ai, i mea na e vaai i ai ma mea na e faalogo i ai.

A mou le gagana, ua soloia fo'i le faavae e tu ai se nuu.

Tofi

O le tofi e pei o le ma'umaga, e iai le galuega fa'aaauu. E le o se mea e aumai e fai ma teu fugalaau, pe lafoa'i i le tuugapalai. A le to'aga e vele le ma'umaga e au ina pe le talo pe susū. A le to'aga e ta le vao ma toto le lafo, e au ina oge 'ai.

A oo mai le valaau a le Atua ia te a'u ma outou, e ono mafai ona tatou faapea atu i fanau: Tautuana ma outou le tofi o Samoa. E le o se tofi e uafalolo ai tagata Samoa, poo se tofi e faalagolago i fafo, a o se tofi e malu ai latou ma a latou fanau.

Matai

O matai, o auala ia sa filifili ai e o tatou matua ta'ita'i i aso ua mavae. E tali ai o latou mana'o. Lo latou mana'o i se ta'ita'i e faafoeina le lotoifale o aiga. Lo latou mana'o e faafoeina le pulega nuu.

Afai e le malu malo ma ekalesia i le amiotonu ma le alofa o matai, e leai se lumana'i o matai.

Aganuu

O tu ma aganuu e suisui pea mai lea tupulaga i lea tupulaga. Ma o na suiga e afua mai i le suiga o olaga o tagata.

O le aganuu e le mafai ona tautala mai i le loto ma le agaga, e au ina mou ma mavae atu.

O le aganuu e faavae i le alofa, i le tautua, i le faatau alofa.

Mau ma le amio

Afai e te tatalo i le falesa: Le Atua e, ou te alofa atu i lo'u uso faapei ona ou alofa ia te a'u, ae e te le amio a'i, e te talapelo, e te faatautala, e te fai togafiti. O le uiga lena o la'u upu, e le sili atu le momoli o le mau i lo le faatino o le mau i la tatou amio.

Kerisiano ma le Aganuu

E tatau ona so'oa lelei le mau faa-Kerisiano ma le taga o le aganuu ina ne'i mea ane ua fetoa'i.

Mau a Keriso

O le mau faa-Kerisiano e leai sona tuaoi eleele. E leai foi sona tuaoi taimi.

I soo se mataupu e aafia ai le amiotonu, e iai le sao o le mau faa-Kerisiano.

Auā o le finagalo o Keriso ina ia faatonu e le fe'au a le satauro la tatou taulaga ma mea tatou te fai.

Mamalu

O mamalu e māmā mamafa i lou finagalo; a e loto e sili i lou taliga e atoa a le vaiaso o mau lau manava.

Taga

Ou te manatu e le āuga ona so'ona fai o ni taga i fuatia oe e tagata i lou faamafulifuli.

O taga ua na o ni auala e molia le fe'au.

Fuafua tatau

E le aoga ona faaaluina lou malosi po o ni tupe mai le fia tagata po o le logovii a ua le talafeagai ma lou mafai. O le tasi lea vaega o le faautauta po o le fuafua tatau.

Taimi

E le mailoa se tua'oi o ananafi, nei ma ā taeao, auā fo'i e leai se amataga ma se faai'uga. Auā o le 'auga ma le misiterio o le olaga, e luagia le oti i le fanau mai. La lea, o se tasi o moni o le olaga faaletagata, e tumau pea ananafi, le asō ma ā taeao.

Talitiga ma le Tofa

O le taeao afua lea tatou te sula i le asō ma le folafolaga o mea e ono taunuu ā taeao ma ona talatu, ua avanoa talu ai le tofa na faafailele e mea lelei ma mea tīgā na tutupu ananafi po o fatia ua alu.

Faautauta

Ou te manatua tima'i a Afele e faasino i le ola faautauta. Fai mai a ia: tautuana, faasoaso lelei; e tupu le faalavelave ona ua pulea e le faamaualuga le faautauta.

Fa'aaauu i le itulau e 5

Faasoa o Faapitoa:

O le tofa loloto a Tui Atua Tupua Taisi Tufuga Tamasese Efi

Su'emalo

O le atunuu o Samoa, o le atunuu e le faama'itea. A faama'ite i mea lelei, latou te faia mea e aupito sili ona lelei. E faapea foi ona latou faia o mea leaga pe a faama'ite i mea leaga. O se atunuu taliupu ae a liliu e su'emalo, o se atunuu lotomau, loto malosi.

Faia'oga

O le tamā lelei, ma le tamā alofa, o le faia'oga. O le toa lotomau ma le lototele o le faia'oga. O le ta'ita'i manafanafa ma le faautauta o le faia'oga lea o lona atunuu.

Ia avea oe ma faia'oga alofa ma ia faaali mai lona alofa i lau amio. E lagona lava i tino o tamaiti le faia'oga alofa ma e asosi foi i ai.

O le faia'oga lelei e le mavae lana a'oga i mafaufauga o lea tupulaga, ma lea tupulaga, ma lea tupulaga.

Loto taumafai

O i tatou uma lava e le atoa le malosi ma le mafaufau, a e iai ē sili atu le afaina i lo isi. Ou te manatua foi le upu a le tasi tagata lauiloa: Aua le fetuu le pogisa ae tutu sau lamepa.

Afai o iai nisi o i tatou o loo faatuutuu i le vaivai, afai o iai nisi o i tatou o loo fetuu le Atua ma lana faasoa. Afai o iai nisi o i tatou o loo faamaualuga i lona malamalama ma lona malosi, o le pogisa lea e ao ai ia i tatou ona tutu ni a tatou lamepa, ina ia suluia i le agaga o tagata ia le loto taumafai.

Va fealofa'i

Aua ne'i alo tamala le matai i le taule'ale'a auā o ia foi—o le taule'ale'a lea—o loo faamalumu mai i ai le Atua i lana galuega, ma e ono auala mai ia te ia lona finagalo. Aua foi ne'i fanafana le taule'ale'a i le matai, pe faataute'e le fanau i le matua, auā o loo faamalumu le Atua i a latou matafaioi.

Lelei ma Leaga

Soo se mea lelei i le lalolagi nei e iai ma lona itu leaga. Ma ua le tatau ona soona molia i tatou i le matagofie po o le matalasi, ona foliga lea o le a tatou tauaso i le itu leaga. E ao ona o tatou mataala, auā i so o se galuega lelei o loo faamalumu mai ma le leaga.

Faafitauli

E ui i faafitauli o tupe ma faafitauli o taumafa a o le faafitauli e sili ona faafaigata ona faafoe, o le faafitauli o tagata. E iai faafitauli faaleaiga, faafitauli faalelotu, ma faafitauli faalenuu. A ua fulitua tagata i le finagalo o le Atua ma ua le mata'u i le to'asa o le Alii, o le faafitauli lea e ta'ua o le faafitauli faalelotu.

Sini o le A'oga

O le sini o le faamoemoe o mea nei o a'oga, ina ia maua e le tama a'oga se malamalama, e ono mafai ai ona ia vaevae ma faavasega le sa'o ma le sese.

E ui i le a'oga ma le tāua o le togi lelei, a o le mea e sili atu ona tāua o le fa'aaoga tatau o le malamalama e maua mai i a'oga.

Taleni

O le taleni muamua, ia iloa faavasega ia le mea sa'o ma le mea sese. Lua, ia iloa faavasega ia le taimi e fuafuaina ai se mataupu ma le taimi e ao ona faatino ai se fuafuaga. O lona tolu, o le taleni e soosoo ai mafaufauga.

Talavou

O le fautuaga i tupulaga talavou, 'aia tatou te sopo tuaoi, ae o le fautuaga matua, ia a'oa'o tupulaga talavou e fa'avae i le Tusi Paia, ae le o mea fa'afiafia e pei o telefoni ma soo se mea fa'afiafia i ona po nei, auā e fa'alagolago le ola manuia o fanau i auala e a'oa'o ai e matua i latou.

A tu'inaanau le uafalolo ona fanau mai lea o le lima tagoese. O se tasi nei o fili o loo lamatia ai le olaga o fanau talavou.

Filifili galuega

O loo faitau nisi tagata vaganā ua e alu e te faa-faifeau ona fa'aaoga lea o upu: ua valaau mai le Atua. E sese lea faitau.

Solo le falute

Tatou te sapi i la tatou aganuu, tatou te tautala faamama'i i la tatou agaifanua, ae ui i lona sapi poo lona tautala faamama'i, ua le mafai ona ufiufi ai le mea moni, ua aga'i ina solo le falute. Tau ina afea i sa'u faamatalaga foliga vaaia o le le maopoopo, o le uafalolo o aiga, o le solitulafono o fanau, o le fetuatuana'i o nuu.

Pulega nuu ma malo

E lei faapea mai le Atua, o Tumua lea a o Pule lea, o faleupolu ma Aiga lea. E lei faapea mai foi le Atua, o matai ia, ma o le tulaga lea o Tui, a o le fe'au lea a Seve. O mea sa faia e o tatou tua'ā ma o matou nei matua. E lei mafua ona fai ona ia malaia ai tagata, pe ina uafalolo ai tagata, na faia e manuia ai tagata.

Samoa

O Samoa o le aiga.

Tofa ma le faautaga

Afai e tula'i mai i lea vaiata o le anava ua i le tofa, e faatu'utu'u le faautaga. A tula'i mai i le isi vaiata ua i le faautaga le anava, e faatu'utu'u le tofa. O le tua'oi o le tofa ma le faautaga e tausua e le ava fatafata, pe liliu i se isi gagana, le fa'aaloalo ma le alofa.

Ata fa'auau

E mana'omia tele lo tatou saili mo le uiga, le isi uiga, le atalilo e maua ai le aano ma faavae ai faavaa i a tatou talanoaga ma o tatou tua'a, i tatou ma isi aganuu.

O suiga ma le su'iga fefiloi o ni vaega o le olaga. O soo se aganuu ola e le mafai ona faaualoa e le taga poo se faiga e fetoa'i ma le faavaa o le olaga faaneionapo.

Tua'oi

E fa tua'oi tāua i le mau a Samoa: o le tua'oi o le Atua ma le tagata; o le tua'oi o le tagata ma le agaga, le mafaufau ma le tino; o le tua'oi o le tagata ma le uso a tagata; ma le tua'oi o le tagata ma lona si'osi'omaga.

Paleni

Soo se mea lelei e afaina lona lelei pe a soona fai. Soo se tapenaga matagofie, e afaina pe a papagu. E oo foi i le sauniga mamalu, e afaina pe a sasalu.

Fausaga

O le fale e soo lelei lona faavae ma le tualuga e le gata i le matagofie i le vaai, a ona o le mausali o ona fausaga, e ono mafai ai ona tatalia le ma'ema'eā o se ta'uta'u.

I se uo faamaoni

Ou te manatua pea ia i lona faamaoni ma lona taofi mau. Ou te manatua pea ia i lona fale e tumatilatila i luga o Vaea e foliga e faatauemu i le savili ma le faititili.

Le Atua ma le mea moni

A ua tatou o'o loa i le muta'aga o faigamea, ia o tatou asiasi i ona o'oga. O le amataga ma le muta'aga o faigamea o le Atua lea, ma a ta'ua o lona suafa, e ao lava ona tatou ta'u le mea moni.

Mea e tumau

Pau a mea e tumau i le olaga lenei, o le alofa ma le amiotonu. Aisea? Auā o le alofa o le Atua lea. O le amiotonu, o le Atua lea. Ma o le mea e iai le Atua, e tumau.

Faatonu:

O lenei folasaga o le tofa sasa'a i le Tui Atua o se tufuga sa'oloto o faalumaga mai ana tusitusiga. Ua faavasega i lalo o ni autu, ma e le o atagia ai se atoaga o lona finagalo i nei mataupu. Pau lea ua na o sina faama'alo i nisi o faitau taua i ana saunoaga, poo faavaa o upu e sii mai ai. O ni lape i le lomiga ma le filiga o autu e toe foi mai i le puletini. Faafetai.

UILI FAU UPU

Saili tali o fesili o lo’o i lalo. Pule oe pe sipela i luma (clockwise) po’o tua (anticlockwise).

E sa le feosoosofa’i.

1. Ta’u mai ni uiga se lua o le upu *fao* i le Igilisi:

2. Sa’ili ni upu se 5 e faai’u i le fasiupu *noa*

3. Su’e se upu e 9 mata’itusi ma tusi sona fa’amatalaga:



4. Tusi uma upu/ fuiupu e ta’i 3-9 mata’itusi, ma o latou soa i le Igilisi (E faitau ai ma upu ta’ua i le 1, 2 & 3)

Lelei atoa = 12 upu

Lelei tele = 8 upu

Lelei = 6 upu

SU’ESU’EGA: FAASOA LE I’A MA LONA ATA

1. MATAMŪ

2. ILILIA, SAESAE

3. LO

4. UME

5. SA’ULĀ

6. MALAU



Galuega fa’aopoopo:

1. E iai ni aoga o nei i’a i le si’osi’omaga?

2. E iai ni upu a Samoa e fai i ai?

3. O a ni faailoga e tulagaese ai?

4. O a o latou igoa faa-Peretania?

(Fesili i ou matua pe a e le iloa le tali)

SUDOKU: Faatonuga:

Fa’atumu pusa numeru (tama’i sikuea) i fuainumera 1 i le 9.


Ia uma ane le galuega ua maua atulaina ta’itasi (tu, fa’alava) o iai le 1 i le 9. E tofua le atulaina ma lona fa’atulagaga e ese mai le isi.

EDITOR: Rights to the above images reserved.

PASO I GAGANA E LUA

Faatumu i upu/igoa Samoa e soa ma upu Peretania.

Fill crossword with Samoan equivalents or as directed.



Faalava ~ Across

1 tomatoes (6)

4 mail (4)

8 animal (4)

9 drown (6)

11 Lieutenant (6)

12 cement (4)

14 team (2)

15 son (6)

19 if (4)

22 air (2)

24 satisfied (5)

27 to make, build (5)

28 true (3)

29 be up early (5)

30 ozone

Lalo~Down

1 grown up man (7)

2 remember (7)

3 stand (2)

5 Herring (fish) (5)

6 Samoan culture: showing deep sorrow etc (5)

7 weather (3)

10 it seems likely (4)

12 tide comes in (3)

13 battery (3)

16 rooster (3)

17 Ivory (3)

18 fine mat, com. name (2)

20 to put things inside a basket, tuck (5)

21 mucus of the nose (5)

23 Address for God (4)

24 thing (3)

25 two

26 flash (3)

SUDOKU ~ TAALOGA I NUMERA

(sudoku.com)

5	6		9					7
			6	8	7	9	1	
1	9		2	5		6		
6		5	4					2
2	1				8		6	4
		4			2		9	8
9				4	5	8	7	1
	5							
	7				1	2	5	